

Antwoorde des Princen van Orangen aen den Hertoghe van Alven op sijn Daghement.

Myne Heere,

Na dien mijn handelingen ende actien connen ghenoech betuyghen, dat ick sedert mijn jonckheyt niet so seer ghesocht en hebbe als my te employeren in den dienst van hoochloflijcker memorien den Keyser ende daer na van den Coninck, mijn Meesters; soo hadde ick verhoept dat sijn Majesteyt, die ick hadde gewaerschout (soo ick oock ghedaen hadde de Hertoginne van Parme, alsoeden Regente), dat ick in desen mynen Graefschap van Nassou was gecomen om sekere myne nootelijke saken, regard nemende op mijn ghetrouwicheyt ende begheerte niet ondergelaten en soude hebben van my soo vele gunsten te bewijzen, als van my te gebieden, waer inne ick hem dienst soude hebben moghen doen (dwelck ick altyt hadde by myne voorschreven brieven van advertencien ghepresenteert) oft ymmer ten minsten dat ick van u soude hebben verstaen, dat de meyninge ende intencie van sijn voorseyde. Ma. ware gheweest, dat ick myne saken alhier soude verlaten ende terstondt aldaer wederkeeren. gelijk ghy allen den anderen Heeren Staten ende Steden sijnder Majesteyt intentie geadverteert hebt. Ende ter wijle ick altyt verwachtende ben gheweest met grooter ghenegentheyt de bevelen van sijnder voorschreven Majesteyt, ben ick ghewaerschout worden, dat men hem heeft vervoordert van tegen my te procederen by aentastinge van mynen Heerlijcheden, Landen ende goeden ende dat noch arghere is by uitroepinghe onder den name van den Procureur generael, wesende vol van valsche ende onverdrachlijke calumnien. Ende daerna noch by apprenhensie van mynen Sone, dien ick ghelaten hadde te Loven, om namaels te beter dienst te moghen doen den Coninck ende den Lande, waer af ick seer verwondert gheweest ende heeft my wel vremdt

ghedocht, dat men in sulcker vueghen heeft gheprocedeert teghen een van mijnder qualiteyt, vergetende soo haest de groote sonderlinghe diensten, soo wel by mynen voorsaten als by my ghedaen ende int besonder oock gheduerende desen lesten troublen. Mits den welcken ende want ick redenen ende goede ghenoechsame iustificatien hebbe om te fonderen ende te bewijzen mijn ontschult ende het onghelijck, dat men my desen aengaende doende is, de welcke ick verhoude tot synen tyde ende plaetse; soo hebbe ick teghenwoordelijck wel willen in haesten antwoorden den voorschreven Procureur generael ende voor d' expiratie van den gheprecipiteerden termijne my gheprefigeert hem verclaren ende bewijzen de nulliteyt ende andere redenen, die ick hebbe tegen sijn Dagement. Op dat men niet en dencke dat ick my schuldich kenne oft dat ick niet en meyne mijn recht te vervolghen, soo ick tselve met redene sal vinden gefondeert. Waer af ick oock aen u (mijn Heere) de insinuatie hebbe willen doen, u hiermede overseyndende het dobbel van den brieven, dien ick den voorschreven Procureur heb gheschreven, op dat, by ignorancie, tegen my oft het myne niet voordere en worde gheattempteert oft gheprocedeert, dan men namaels met rechte en sal connen sustineren totten welcken ick noch eens hope mijn verhael te hebben. Ende want dese nergens anders tot en dient, soo bid ick God, dat hy u (mijn Heere) in ghesontheit verleene, dat u salich is; ende my dat mijn Prince mach eens na der waerheyt verstaen de oprechticheyt van mynen handelingen ende actien.

Uut Dillenborch desen derden Martij 1568 Onder stontd geschreven U medebroeder Guillaume de Nassou. Ende opten rugge: Aen mynen Heere, mijn Heere den Hertoghe van Alven.